

# Хальмг АССР-н Деед Советин Мандатн комиссин ахлач депутат С. С. Волковин доклад

Зүүрмүд депутатир!

Хальмг АССР-н Деед Советин Мандатн комисс, Хальмг АССР-н Конституцин 31-ч статьяла ирлцүлдж, 1958 джилин октябрин 19-д Хальмг АССР-н Деед Советд суньгьгдсн депутатирин полномочиг шүүдж хэлэв. Хальмг АССР-н Деед Советд суньгьвр кехин төлө суньгьврин 95 округ бүрдэгдсн. Суньгьврин цуг округсар суньгьвр кегдв.

Хальмг АССР-н Деед Советд суньгьгдсн цуг бийн 103.851 суньгьгач орлцв, эс гидж спискет орулгдсн суньгьгачирин ут тоогъас 99.98 процентн. Депутатирин кандидатирин төлө дуугъан өгсн 103.229 суньгьгач, эс гидж дуугъан өглгдсн орлцсн суньгьгачирин ут тоогъас 99,4 процентн.

Депутатирин кандидатир темдгддж бичлгнэ протоколмудиг болн суньгьврин дуугъан өглгнэ Округсин комиссүдин протоколмудиг, бас тер мет суньгьврин Центральн комиссин илгэсн материалмудиг шүүдж хэлэгъад. Мандатн комисс, суньгьврин цуг 95 округар кегдсн суньгьвр Хальмг АССР-н Конституцла болн «Хальмг АССР-н Деед Советд суньгьгдсн туск цаг зуурин положенлэ» күтц ирлцнэгъгъяр кегддж гидж токтагдв. Баллотироватц кегдсн кандидатир цугъар Хальмг АССР-н Деед Советин депутатд суньгьгдв.

Деед Советд суньгьгдсн Хальмг АССР-н күч-көлчирин авртэ ик патриотическ оргмктэгъяр, өөдөн политическ шунмгъагъяр болн бүрдэмдэжтэгъяр кегдэл. Хальмг АССР-н олн-амтн эврэннэ төрсн Коммунистическ партидан энъ зах уга итклтэг шинэс герчлдж медүлв. Коммунистическ парть болн Советск правительств, олн келн амттэ Советск государствн чидлин булг болгч — мана Төрснэ олн келн амтнэ иньгллгьиг цуг халха-

рнь батлна. Советск Союзин олн келн амтнэ тер иньгллгьичэ айта гидг герчнэ—мана республикин Деед Советин депутатирин хань болджана. Суньгьгдсн 95 депутатас — 43 орс, 49 хальмг, мана республикд баях талдан келн амтсн элчир — 3 күн. Депутатирин тоод 45 көдлмшчир болн колхозникуд талданар келхд промышленностьд болн селэнэ эдл-ахуд бийрн орлцдж көдлджэх улс.

Советск күүкд улсин обществн-политическ болн производственн шунлтнэ джил ирвэс өсэд йовна. Деед Советин депутатд 35 күүкд күн суньгьгдв.

Хальмг АССР-н Деед Советин депутатирин тоод Советск Союзин Герой, отставкад баях генерал-полковник үр Ока Иванович Городовиков суньгьгдв.

Хальмг АССР-н Деед Советин депутатирас 53-нэ ах, күтц эс чилэгдсн ах болн дундин сургьульга. Эн то мана республикин олн амтнэ культурн кемджэн зогелго өсдэ йовхиг медүлджэнэ.

Депутатир насарн болхла ним: 21-с авн 30-та күртл — 19 күн; 31-с авн 50-тэ күртл — 63 күн; 50-с өөдөн наста — 13 күн.

Хальмг АССР-н Деед Советин депутатд Советск Союзин Коммунистическ партин 58 член болн кандидат, партин биш 37 күн суньгьгдв. Эн мана олн амтнэ Коммунистическ партьд кир-кемджэн уга итклтэг герчлдж үзүлджэнэ.

Эн джилин октябри 19-д болсн суньгьврт коммунистир болн партин биш улсин олн амтнэ блокн кандидатирин төлө цугъар дуугъан өглгнэ—мана партин болн Советск правительствин политикиг цуг олн амтн чик гидж, дөнъяллгнэ нег аньгн болдж, Хальмг АССР-н Деед Советин депутатир олн амтнэ өөдөн итклиг күнэдж, мана социалистическ Төрснэ цаарандк цецглтин төлө, коммунистическ тосхлтин алдр программиг джиргьлдүннэ

орлцулдж күнэхин төлө нертэ кевэр амэн арвлго теди ноолдх гидж советск улс итклгь болджана.

Зүүрмүд депутатир! Мандатн комисс, Хальмг АССР-н Деед Советин депутатирин полномочиг шүүдж хэлэснэ ашд ним шиндвр авад, тана хэлэврт орлцдж өгчэнэ.

Суньгьврин Центральн комиссин илгэсн суньгьврин цуг документсиг болн Хальмг Автономн Советск Социалистическ Республикин Деед Советд суньгьгдсн материалмудиг депутат болгънар онц-онцднэ шүүдж хэлэгъад, Деед Советин Мандатн комисс ингдж тогтав:

1. Хальмг АССР-н Деед Советд суньгьгдсн суньгьврин цуг 95 округар, Хальмг АССР-н Конституцас болн «Хальмг АССР-н Деед Советд суньгьгдсн туск цаг зуурин положенэс» иштэгъяр болн күтц ирлцүлдж кегддж.

2. Суньгьврин альк чигн округар суньгьвриг кассировать кедг уршг болн, бас тер мет Хальмг АССР-н Деед Советд депутатир суньгьгдсн Хальмг АССР-н Конституциг эс гидж «Хальмг АССР-н Деед Советд суньгьгдсн туск цаг зуурин положениг» суньгьврин округсар чигн, суньгьврин Центральн комисс чигн эвдв гих ямаран чигн заргь бэрлгн болн герчлгн уга.

Деер келгдснэс иштэ, Хальмг АССР-н Деед Советин Мандатн комисс, суньгьврин Центральн комисс темдгддж бичсн, Хальмг Автономн Советск Социалистическ Республикин Деед Советин депутатирин цугтаннэ полномочиг чик гидж тоолхин туск селзг Хальмг АССР-н Деед Советин батлврт орулдж өгчэнэ, депутатирин список 1958 джилин октябрин 21-д гарсн 210-ч номертэ «Советская Калмыкия» газетд болн 1958 джилин октябрин 21-д гарсн 211-ч номертэ «Хальмг АССР-н» газетд барлгдсн.